

Službeni glasnik BiH, broj 56/15

Na osnovu člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08) i člana 75. stav (2) Zakona o javnim nabavkama ("Službeni glasnik BiH", broj 39/14), Vijeće ministara Bosne i Hercegovine, na prijedlog Agencije za javne nabavke Bosne i Hercegovine, na 11. sjednici održanoj 17.06.2015. godine, donijelo je

UPUTSTVO

O OBJAVI OSNOVNIH ELEMENATA UGOVORA I IZMJENA UGOVORA

Član 1. (Predmet)

Ovim uputstvom se uređuje forma, sadržaj i način objave osnovnih elemenata ugovora, kao i svih izmjena ugovora do kojih dođe u toku realizacije ugovora.

Član 2. (Obaveza ugovornog organa)

(1) Ugovorni organ iz člana 4. i 5. Zakona o javnim nabavkama (Službeni glasnik BiH", broj 39/14), (u daljem tekstu: Zakon), nakon što dostavi izvještaj o postupku javne nabavke Agenciji za javne nabavke, dužan je na svojoj internetskoj stranici, ako je ima, objaviti osnovne elemente ugovora za postupak javne nabavke, kao i sve izmjene ugovora do kojih dođe u toku realizacije ugovora.

(2) Objava osnovnih elemenata obavezna je i u slučaju zaključenja okvirnog sporazuma.

(3) Objava iz stava (2) ovog člana se vrši na obrascu koji je sastavni dio ovog uputstva.

Član 3. (Sadržaj obrasca)

(1) Obrazac iz člana 2. stav (3) ovog uputstva sadrži:

a) Redni broj,

b) Opis i Oznaka po Jedinstvenom rječniku javne nabavke,

c) Vrstu postupka i broj obavještenja o dodjeli ugovora sa Portala javnih nabavki, za postupke javne nabavke za koje postoji obaveza objave obavještenja o dodjeli ugovora,

d) Podatke o dobavljaču/dobavljačima u okvirnom sporazumu (Naziv, ID broj, mjesto),

e) Osnovne elemente ugovora/okvirnog sporazuma (vrijednost, period trajanja/rok izvršenja, rok plaćanja, garantni period i dr.),

f) Opis izmjene osnovnih elemenata ugovora sa datumom izmjene,

g) Ostatak vrijednosti ugovora nakon učinjene izmjene/ostatak vrijednosti okvirnog sporazuma (nakon zaključenog pojedinačnog ugovora),

h) Datum zaključenja ugovora,

i) Datum potpune realizacije ugovora/okvirnog sporazuma i ukupna utrošena vrijednost,

j) Napomenu/obrazloženje (značajnije izmjene, raskid ugovora i sl.).

(2) U slučaju zaključenog okvirnog sporazuma, objavljuje se obrazac iz stava (1) ovog člana Uputstva, izuzev podataka iz stava (1) tačka f) ovog člana.

(3) Obrazac iz stava (1) ovog člana se objavljuje i u slučaju ugovora u oblasti odbrane i sigurnosti iz člana 8. stav (4) Zakona.

(4) U slučaju ugovora za neprioritetne usluge iz člana 8. stav (1) Zakona i ugovora koji su dodijelili diplomatsko-konzularna predstavništva i misije Bosne i Hercegovine iz člana 8. stav (5) Zakona, objavljuje se obrazac iz stava (1) ovog člana uputstva, izuzev podataka iz stava (1) tačka c) ovog člana.

(5) U slučaju ugovora iz st. (3) i (4) ovog člana, obrazac se objavljuje u roku od 30 dana od dana zaključenja ugovora.

Član 4. (Ažuriranje i dostupnost podataka)

Podaci iz člana 2. ovog uputstva za svaki pojedinačni ugovor se ažuriraju najmanje svaka tri mjeseca i moraju biti dostupni na inernetskoj stranici ugovornog organa najmanje tri godine od datuma potpune realizacije ugovora/okvirnog sporazuma.

Član 5. (Izuzetak od primjene)

Ovo uputstvo se ne primjenjuje za ugovore dodijeljene po osnovu izuzeća od primjene Zakona iz člana 10. i za izuzeća za sektorske ugovorne organe iz člana 86. Zakona.

Član 6. (Stupanje na snagu)

Ovo uputstvo stupa na snagu osmog dana od dana objave u "Službenom glasniku BiH".

VM broj 70/15
17. juna 2015. godine
Sarajevo

Predsjedavajući
Vijeća ministara BiH
Denis Zvizdić, s. r.